

中國方志叢書·華中地方·第七八九號

據

清·江爲龍等纂修
清康熙四十七年刊本

影印

江西省

宜春縣志

(四)

成文出版社有限公司印行

中華民國七十八年三月臺一版

宜春縣志

共四冊

發行人：黃

成助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市南京東路三段270號9F

電話：七四一五四三二一九

印刷者：上林彩色印刷有限公司

台北市大理街145號

新聞局出版登記證：局版台業字第一一四三號

宜春縣志卷之十六

藝文三

記

鳳竹徐公生祠記

張春

鳳竹徐公始令宜春擢南臺也越十有餘歲而袁人有去思亭之建鄉進士邇川楊子記之矣又越十有餘歲來撫江右公視列郡如一而爲置學田袁所獨也太史鳳林張子記之矣時袁人已在建祠之議公聞峻止弗遂其私蓋嚴氏產連數郡官旣征其租賃

佐軍需歲額取盈耕住者罔避荼毒若櫟若穽數郡
皆然而袁爲甚公廉其狀會疏奏乞斥賣受直兩便
官民學田者特袁產匿報之一端耳袁人昔茹苦滋
于他郡者感德更深相與籲天而祝曰微公曷活我
公擢司空往又數歲感而祝者曷能頃刻釋此祠之
不容以不建也士民易梯等遂倡前議捐貲鬻地鳩
工聚材爲寢堂 若干楹肖公像于其中爲前堂一
爲門一廣稱之而各易以廟室繚以周垣制閤且備
矣先是嘗白于郡侯景山程公未及成而遷去茲告

成于郡侯雲洲鄭公請勒石之文用垂永永予惟
政之孚積久而益著中心之感愈抑而彌堅是祠之
役也公能拒之于相臨之日而不能遏之于旣遷之
後斯民之直道尤章盛世之古風攸復豈非久而益
著抑而彌堅者乎然人皆知公位日崇澤之廣被化
之大行易易耳而不知其有所本也夫造家者始之
拮据艱難亦孔瘖矣已而宏展厥猷規畫素定爰啟
寧宇紹厥祖世篤其惠斯承休也曷有旣哉故聖人
以綢繆牖戶爲知道之咏言立之豫也燕翼貽謀爲

數世之仁吉流之遠也公筮仕時卽計袁之利病若何罔不條貫于中力所任任而爲之所弗克者任未究也則江右之政孰非素定于袁者推之耶而袁人世受其賜矣然又非始于袁也公家食時卽殫精于坵文莊衍義補一書凡天下之利病其暫可行與久而不可易者又莫不條貫于中藏器待時動有矩矱當繁劇嬰變故身所未經者若熟諳衆所難決者可立辦匪畜之豫能耶是故爲賢令爲名御史爲良書臬爲衛社稷大臣剔歷中外所至霑渥誠孟氏所譔

有本者如是而可徒以崇位掩其實德哉公之嘉績
在在頌述江右之績又槩見于會城遺愛祠記中故
不具論茲本袁人立祠之意誦其德之及于袁所以
繫袁人之思者如此而不足以盡公也祠在郡城東
之通衢諸與是舉得附名于碑陰

宜春袁先生祠記

錢 櫨 提學

漢陳仲舉爲豫章守甫下車而首訪徐孺子特設一
榻以待至今以爲美談子癸已承乏袁陽歲幾遇其
人而不可得進而求之于古有袁先生京亦漢人隱

居不仕讀書兩山中世咸高之因各郡爲袁州山亦
爲袁山而郡無其祠咎在有司予以初至力不能特
創卜地宜春學右得舊驛舊存堂一楹門垣漸就圯
矣喜其易舉將有事焉尋以憂去不果遲之十年予
復視學江右行部袁陽而郡刺史高君以舊誼觴予
于宜春臺遙望故址并其堂與門垣無之矣予撫然
道故高刺史請以身任之不一年祠成徵予言爲記
且曰是公故志也予因歎古之王侯將相或有功地
方及生長數土既沒而人思之爲之立祠以識不忘

又未足而卽其生平所居所經之山水而艷名之止
矣今以之名郡似止者浙西之嚴與江右之袁則以
子陵與先生故兩人皆布衣而兩郡之名皆增而重
餘鮮聞者如所稱徐孺子第以懸榻名其里而豫章
之郡不改乃袁猶然不敢直斥其名而祇借其姓旣
以名郡而更又以名山尤足重也及欲數其事而稱
之則寥寥無聞卽徐孺子陳義至高亦厯厯炙雞絮
酒遠辭友人一事爲可稱繇此以談士君子砥行立
名而垂芳耀景者豈必名位勲猷哉然而孺子不遇

陳仲舉亦何所托以不朽千載而下誰知南州之有
高士惟闇然自修較然不欺而姓名湮滅泯泯不傳
者古今亦不少也今豫章有孺子祠歲祀不絕而袁
陽尚未舉行非先生之不能爲孺子固予之不能爲
仲舉耳顧前此自歎至今莫之舉矣而余始欲舉之
卽予欲舉矣又不克終而直待今日是亦有數也是
役也高刺史寔首倡而陳司馬經營尤力卽其本山
佃金得百餘不煩官帑宜春周令又以俸佐之始落
成焉爲堂五楹奉先生于後而前堂亦五楹爲講堂

左右廡各十諸生肄業其中門樓翼然郡城如屏秀
江若帶學宮踞其東長橋跨其西稱大觀矣寧不足
一當先生乎刺史高名爲表番禺縣人司馬陳名啟
孫餘饒縣人宜春令名應偁吳江縣人皆得並書

新置學田碑記

袁業泗

南鴻臚卿

今皇帝在宥之三十七年郡伯汪侯蒞吾袁且三載
矣寬而粟治而敬擾而毅簡而廉九德咸備吏民畏
懷諸蠲政弗能殫述獨置學田一事勵人心維士風
關係久遠寧容無言以紀不朽竊惟朝廷廣厲學宮

給以廩佐以膳規制亦云備矣而學田何居尤當事者周思曲慮嘉惠無窮已也我汪侯政先教化毅然以興起斯文爲已任獎恬靜退陽簪日有會月有課親臨校閱弗塗空文諸所勞費割俸勿問大造我袁士亦旣渥矣猶以爲國家尊賢養士覲食報于他年有司當官儲材寧飾采于一日不可以當吾世而失遠圖必置田遂捐金七十餘兩得腴田于高坵周家坪處歲租七百二十二俾諸弟子員永永藉焉已又慮往時學田出入一秉學使究之士未沾升斗而文

簿書往來勾校反爲學擾侯曰吾設田獵虛名邪
悅當道耶將令閭閻下士飲食我卵翼我庶一日有
天地則一日有吾澤在田設而上不請租入而官
無與收支惟學豐儉惟學一切賑貧弔乏惟學厚諸
生以實而勿擾諸生以名嗟乎士固有志不振則不
厲士固有氣不養則不厚二三子亦知汪侯設田之
意乎修禮以耕陳義以種講學以耨本仁以聚咀其
華沃其根晬盎有徵四體充盈身之肥也父慈子孝
兄良弟恭夫信妻貞長惠幼順家之肥也嘉謀嘉猷

我后賴之大法小廉百辟式之國之肥也或司封疆
或領中原邊鄙安瀾黔黎輯睦天下之肥也則我汪
侯今日學田之設毋乃欲二三子肥其身以肥家國
天下乎不然而徒希心于利達滿志于溫飽使下士
大笑之而亦甚非我汪侯建田雅意矣夫天下靡學
無記獨吾郡學記海內奉爲著龜總之忠孝兩言耳
今汪侯平明之政不減于祖君而修學設田之旨遠
振夫忠孝此異代而同符曠世而一轍者也二三
亦悚然于中否耶是用書其基址稅畝租利俾後

君子清而理之勤而撫之毋忘當世之首事者
若米富川人承金諱錫周臨海人倅李諱鳳王
人司理王諱隆德桐鄉人同心協
址周家坪等處載稅三十九畝有
二桶庄屋一棟二廂每年止納學
免俱

盧洲三元閣記

袁業泗

按盧洲盧狀元肇讀書處臨洲之上品甚卓絕初
石以志于霄韓昌黎刺袁時西北有慶雲見洲寔當
之不數年而肇太魁則洲名尚矣後石移東湖張南

軒且謂其挺然特立望之似汲黯寢淮南氣象嗟乎
一石猶繫人愛况茲洲哉時代遞遷滄桑互易志士
高人徒懷仰止一日鄉紳士民僉曰狀元洲雄據中
央迴瀾砥柱一郡鎖鑰矧盧君寔式靈之建閣壯觀
寶闔郡利賴時郡別駕毛侯從中愆愆之汪向鼓舞
適中州李侯貳守吾袁兩攝篆得修舉盧洲狀忻然
首肯親臨賜額前後捐金幾一百毛侯與司理伍侯
邑廉侯各捐金有差一郡士夫同心捐助三元閣不
日成矣障以石岸周以高垣繡欄星掛綵柱雲連門

廊亭臺漸次重構下蟠地軸上摩天樞中流峻起四
望崢嶸南瞻大邨則鄭拾遺書堂在焉雲臺一編載
入金匱至今炳炳北眺袁岡高士遺跡清風萬古西
顧化巖遙對昌黎文饒遺愛猶堪墮淚朱幡墨綬暇
日登覽倘亦有甘棠思乎東企釣臺以下徵君之風
采太常之忠耿動少微貫日月吾儕亦有意乎倚歟
茲閣成而神靈護綏波恬川澄月恒日升鍾英毓秀
洵足美矣然則地之靈孰翼之靈人之傑孰助之傑
閭閻之豐盛孰錫之盛工始于歲乙卯竣于丁巳計